

洞真太上素
灵洞元大有
妙经

佚名

文硕阁

wenshuoge.com

目录

关于我们	3
目录	5
三洞混化内真变生官号宝名	6
太上道君守三元真一经	10
太上道君守元丹上经	12
四宫雌真一内神宝名玉诀	16
太上大洞守一内经法	18
太上三九素语内咒诀文	23
太真隐朝求仙上法	26
玄都九真明科上品传经篇	28
太帝君偈大有妙赞	35

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

目录

经名：洞真太上素灵洞元大有妙经。简称《大有妙经》。撰人不详，约出於东晋南期。是早期上清派『三奇宝文』之一。一卷。底本出处：《正统道藏》正一部。

目录#1：

三洞混化#2内真变生官号宝名

太上道君守三元真一经

太上道君元丹上经

四宫雌真一内神宝名玉诀

太上大洞守一内经法

太上三九素语内祝诀

太真隐朝求仙上法

太上九真明科

太帝君偈大有妙赞

三洞混化内真变生官号宝名

《太上素灵洞元大有妙经》，三九素语元丹上化三真九洞之道，本与元气同存，元始俱生，三精凝化，结朗玉章，构演三洞之府，摠御万真之渊，乃秘在九天之上大有之宫，金台玉室素灵房中，刻玉为简，以撰其文，金镂玉字，以明其篇。混化三洞，变生上元，中统十绝虚生之天，下理万炁，无幽不关也。流光元蔼，郁乎玉清，飞霞紫烟，耀焕太空。玉华之女、金晨之童，各三千人，侍卫灵文。於时天元值合，庆嘉神庭，元皇玉帝，无上高尊，群真众仙，莫不诣座，烧香礼经，旋行上宫也。玄晨冥滞，飞香翳光，扬芳濯灵，散烟玉京，三素元云，流电霞峰，华光交换，神烛合明，侍女众仙，有十亿万人，毒龙巨兽，备卫灵阙，蟒蛇击剑，长牙扣锤，天威焕赫，变乎太无，八风鼓於玄旌，玉音发於灵宫，凤鸣九霞之侧，鸾唱紫霄之傍，翥翥玄玄之上，萧萧始晖之中。是时天帝君、南极上元君、太微天帝君、后圣九玄金阙帝君，清斋三月，仰稟太冥，玄思感於太寂，积念启於上清，遂致皓映停晖，九纬缠形，隐芝结秀，宝光夜生，餐味华元，上注晨精，乘空结烟，八道焕明，咀嚼太和，慧畅玉篇，徘徊幽微，流逸霄庭，浩浩洞源，悠悠亿龄，容与大化，神秀无穷也。耽栖灵观，洞宴七晨，澄濯华园，息憩九玄，变景玉虚，携领诸天，寥朗二顺，元庆亿津，流盼极劫，挹趣忘旋，沐浴灵丘，兰颖清岭，明范既维，内韵齐全，五华耀藏，皓莹琼心，窈窕绝宅，紫晖洞衿，振策玄河，撻绎惠林，周盼广域之内，目朗十天之音，眇眇神迹，无形可寻，灵化既隐，乘运玄清，条畅纯和，空胎结形，大有之妙观，演於素灵，九天之秘奥，元洞之凝精，理三关於幽府，摠万真於来生，制玄科以检违，赎己愆於太冥，拔七祖於三涂，度穷魂於南庭，诵三帝之慧唱，荡氛秽於三清。大哉玉章，神德之至灵也。

《大洞真经三十九章》，上皇之道标，紫晨之妙篇，制命九天之阶，征召五帝之灵，逸回风之混合，凝九转於玄精，交会雌雄，混化万神，森罗幽郁，琼响太真，运辟非於明梁，通易有於玄门，洞德刃以造妙，濯耀罗以映云，太漠为灵关之气，无刃为浩劫之年，巍巍神馆，万真之渊，金房焕赫，郁乎上清，其旨幽微，难可究详。若能长斋，绝志人门，诵玉篇於幽室，叩琼音以震灵，则真人定策於东华，七玄更润於紫庭，制魔王以威神，摄五帝以卫身。此大洞之奇神，摠亿道而反生，自无奇毛异质，金骨玉名，皆不得有妄披於灵文，其禁悉依《九真明科》，受者慎焉。

《高上玉检雌一五老宝经》，上愿十二，玄母八间，九转五回，变化雌雄，第二奇文，高上之极章，混化万变，理命长存，固魂凝精，领摄群神，解脱释结，回元五通，万炁总归，上镇泥丸，陶注极真，华映紫庭，飘飘朗於九玄，洞畅焕乎玉清，灵烟散馥於明霞，神灯朗耀於太空，群真庆轩於琼房，众仙诵赞而礼经，飞兽踊跃於太空，鸾凤嘈囀而悲鸣，三光停曜，天晖昼冥，浩汗幽馆，高上之极真也。其旨虚鲜，洞趣幽深，妙不可记，理难可穷，若有玉挺，名系玉皇，东华奏札，列于琼宫，当得此文。依科修行，精思天真，长斋苦念，日中乃餐，诵咏宝章，演究灵篇，九年不怠，乃得造真，炼魂魄於九府，理混合於三关，拔七祖於幽涂，度苦魂於

南宫，告形坛以要感，誓信心以求仙。此之妙化，影响降晨，乘虚逸霄，游宴无间也。

太上曰：兆之为道，存思《大洞真经三十九章》，回风混合雌一五老，金华洞房帝君十二上愿，玄母八门行间，太一变化雌一上仙之法，行事之日，每当先自清斋，沐浴兰香，入室内思素灵五帝，元洞洞天、洞地、洞渊之官宝名内字，招真致灵之道，事毕，然后得修大洞雌一宝诀。其法玄微，与炁同生，与天同存。是故太一紫房为混合元父、玄母，以三胎为神明秘言要妙，以九真名为内经大洞，以高上为元始大丹，以雌一为内精，大有之妙经，素灵为洞玄，总三宝为奇文，结三炁为高章，其妙不可测，高不可攀，深不可极，巍巍微哉，斯玉篇之有大德矣。子能勤思，则白日升天，不死之道，二极於灵文也。

洞天混化内真变生宫号宝名

太上神仙洞天元洞元明元曜延灵耀元君，讳玄混，字灵元，头冠飞晨宝冠，衣青锦单裙，手执阳霞朱明之符。

太上神仙洞天元洞青耀少阳启明天君，讳常君，字伯玄，头冠青冠建晨玉冠，衣青绫之裙。

太上神仙洞天元洞黄灵大丹炎熏光大赫太阳君，讳启明，字真威，头冠玄宝冠，衣黄云锦裙。

太上神仙洞天元洞东华太岁重华耀灵太仙元命君，讳始明，字混生，冠飞晨玉冠，衣单青飞裙。

太上神仙洞天元洞东极太元皇灵宝魂耀魄君，讳飞生，字守命，冠青精玉冠，衣飞青羽裙。

太上神仙洞天元洞岁星延崖青腰常阳玉女，讳惠精，字娥景，头作飞云髻，衣青罗飞裙。

太上神仙洞天元洞太阳耀灵南极丈人绛宫玉童，讳上玄，字升灵，头作三角云髻，衣青羽飞裙。

太上神仙洞天元洞景阳东皇青阳翠灵仙童，讳安来，字玄耀，头作三建云髻，衣青文羽裙。

太上神仙洞天元洞赤皇延龄娥容太丹赤圭玉女，讳承灵，字精微，头作颓云髻，衣

朱文羽裙。

右洞天元洞之官，化生青赤二炁，混合自然之号，上治素灵宫中清微之府，下治兆身上元泥丸宫中。

阳霞朱明之符

洞地混化内真生官宝名

太上神仙洞地洞真太炁惑大洞元生大灵机皇君，讳景化，字元精，头戴朱宝三梁之冠，衣绛章单衣，手执通明四洞九元之符。

太上神仙洞地洞真南阳炎域元执法延寿司篆君，讳度生，字延正，头冠玄云宝冠，衣丹文裙。

太上神仙洞地洞真中耀五阳五阴中皇洞极玄天太虚君，讳无穷子，字运度，冠远游冠，衣丹锦裙。

太上神仙洞地洞真中镇耀灵太上高皇君，讳承天，字胤元，冠飞晨冠，衣朱衣飞裙。

太上神仙洞地洞真南极太赤皇灵宝魂耀魄君，讳玄固，字无终，冠玉精宝冠，衣绛章单衣。

太上神仙洞地洞真皇衡赤阳绛章通灵仙童，讳龄期，字升幽，冠通天玉宝之冠，衣绛文飞裙。

太上神仙洞地洞真太镇元黄太素黄机执中五玉童，讳法华，字娥先，作飞云角髻，衣黄罗裙。

太上神仙洞地洞真镇星元神神耀玉□泰素中黄素玉女，讳道炁，字太宗，作颓云髻，衣黄罗飞裙。

右洞地洞真之官，化生赤黄二炁，混沌自然之号，上治素灵宫兰台府，下治兆身绛宫之中。

通明四洞九元之符

洞渊洞玄混化内真生官宝名

太上神仙洞渊洞玄太白留金城耀耀元精元导太先君，讳浩田，字极元，冠玄晨玉宝冠，衣素锦飞裳，手执启明通天宝符。

太上神仙洞渊洞悬太白浩素天机星光君，讳混精，字浩真，冠游云宝冠，衣素文飞裙。

太上神仙洞渊洞玄太白曜金光少阴昊元素上皇白人君，讳浩丹，字正纶，冠玄晨冠，衣白锦飞裙。

太上神仙洞渊洞玄太辰玄洞元阴五耀延灵元华郁单君，讳北浩，字停渊，冠通天之冠，衣玄云锦裙。

太上神仙洞渊洞玄耀黑洞玄门太极五岳仙君，讳法容，字白元，冠玄晨冠，衣玄文单裙。

太上神仙洞渊洞玄北极太仙元皇宝魄耀魂君，讳飞生，字升无，冠通天冠，衣玄衣。

太上神仙洞渊洞玄素耀阴晖元神太极元皇耀灵元化玉童，讳幽精，字变通，作飞云三建髻，衣素文裙。

太上神仙洞渊洞玄阴景西皇素灵仙玉童，讳冲渊，字北极，作颓云髻，衣玄锦飞裙。

太上神仙洞渊洞玄太白延影九导大洞承翼玉门金楼玉女，讳娥廉，字惠精，作颓云髻，衣白罗之裙。

右洞渊洞玄之官，化生白黑二炁，混沌自然之号，上治素灵宫皇堂府，下治兆身丹田之中。

启明通天宝符

太上道君守三元真一经

三洞之道，结自然之号，辅统三宝，《大洞真经》、《雌一五老》、《大有素灵》，应承三元，元洞主天，洞真主地，洞玄主人，三炁合明，同治兆身三宫之中，相须乃成。兆欲不死，当寻本生，服御流霞，以洞为先。凡修三宝上清真经，当先思三洞内真宝名，存念官号，以卫身形，然后修行，克成真人。其法至妙，秘在大有素灵宫中。兆有骨分，当勤行道真，每自苦念，清斋兰香，不犯秽炁，神自见形，一十八年，降致绿輶，乘云控龙，白日升玄。今以告兆，秘而奉行。

常以平旦思洞天，日中思洞地，夜半思洞渊，亦可日中顿思三真。存思之法：入室东向，叩齿三十二通，先瞑目思素灵宫清微府中，青炁、赤炁相沓郁郁，来下入兆身中泥丸上宫，便咽九炁，次思兰台府中，赤黄二炁相沓如先，来下入兆身降宫之中，便咽九炁。次思皇堂府中，白黑二炁相沓如先，来下入兆身脐下丹田宫中，便咽九炁。咽三洞炁毕，便仰咒曰：

天地混沌，洞渊三精，元始结化，五炁混生，变化玄元，灌注身形，服御流霞，升入紫庭，北帝落死，东华记名，洞达幽微，与帝合并。

毕，又叩齿九通，思元洞元明元曜延灵耀元君玄混，以阳霞朱明之符，授与我身。次思洞天生官，衣服讳字如上法，并从素灵宫清微府中下，以次入兆身泥丸宫中。毕，仰祝曰：

洞天上元，监御九玄，总统三炁，混生丹田，披洞幽关，出入无间，魂魄宝耀，缠络华鲜，飞云绛室，游宴紫天，齐保天地，长享亿年。

洞天毕，次南方，向南思洞地洞真大炁惑星大洞元生大灵机皇君景化，以通明四洞九元之符，以授我身。次思洞地生官，衣服讳字如上法，并从素灵宫兰台府，下入兆身绛宫中。便仰祝曰：

洞地中元，总领飞仙，华冠宝耀，腰青建巾，授我灵符，通真致神，洞思幽微，受帝秘言，解胞散结，九孔朗然，七祖咸脱，上升南轩，云舆下降，白日升晨。

洞地毕，转北向，存思洞渊洞玄太白子留金城耀耀元精元导太仙君，讳浩田，以启明通天宝符，以授兆身。次思洞渊生官，衣服讳字如上法，并从素灵宫皇堂府，下入兆身脐下丹田宫中。便仰祝曰：

洞渊幽关，上参三元，玄炁郁勃，飞霞紫云，流黄五色，华晨宝符，服御启明，与元长存，乘空驾虚，游宴玉晨，携提景皇，结友真仙。

洞渊毕，还东向，叩齿九通，咽液九过，三洞毕矣。

子能行之，真神见形，玉女可使，玉童致灵，三元下降，丹舆绿輶，来迎兆身，上升太清。惟在宝秘，慎勿轻传。

太上道君守元丹上经

太帝君、天帝君、太微天帝君，受於太上道君，施行道成，上补帝真。太帝君以经传西王母，天帝君以经传南极上元君，太微天帝君以经传金阙圣君，金阙圣君传上相青童君，青童君传涓子。此素灵之上篇，此道奇於众经，其法高妙，非中仙所闻。自无名书绛简，录字上清者，玄丹之道不相遇也。道士若修太上三真品经，位为帝皇之上公、上卿也。若所遭受者偏，闻道有限者，位为小有灵宫之王，神州之卿，太极中下大夫耳。亦得骋龙驾云，乘飞控虚，神官导卫，散景八遐矣。微乎深玄，难可轻宣也。品经之目，出太上隐书八素篇中，有俯仰之格限也。

夫三一者，乃一身之灵宗，百神之命根，津液之山源，魂精之玉室。是以胃池体方以受物，脑宫员虚而适真，万毛植立，千孔生烟，德备天地，混同太玄，故名之曰泥丸。泥丸者，躯形之上神也。兆唯知吞炁咽津，鸣齿纳液，而不知此所因者，乃泥丸之流沫，脑家之边枝耳。今将告子守一之诀，上真之妙法也。闭口奉修，慎勿宣传，负违盟誓，身没鬼官，考延七祖，长闭河源。

两眉间上，却入一寸为明堂宫，却入二寸为洞房，却入三寸为丹田。丹田直上，辟方一寸，为玄丹脑精泥丸魂宫。

明堂宫中，左有明童真君，右有明女真官，中有明镜神君。明童真君，讳玄阳，字少青。明女真官，讳微阴，字少元。明镜神君，讳照精，字四明。此三君共治明堂宫，并着绿锦衣，腰带四玉铃，口衔玉镜，镜铃并如赤玉也。头如婴儿，形亦如之，对坐俱向外面，或相向也。此明堂之道也。若道士恐惧，存三神，使鸣玉铃，使声闻太极，使口吐玉镜赤光，令万丈。存之俱毕，因三呼三君名字，叩齿九通，则千妖伏息，万鬼灭形也。若道士饥渴，亦存三君，并口吐赤炁，使灌己口中，因吸而咽之，须臾自饱也。若道士夜行，暗不见路，又存三君，使口出三火光照前，须臾路自朗明也。若行凶处厄难之中，有刀兵之地，急存三君，使鸣玉铃，精而想之，敌人自然心骇意慑，不复生害心也。若道士欲求延年不死，及疾病临困，求救而生者，当正心安寝，存明堂三君，并向外长跪，口吐赤炁，使光贯我身，令匝我口傍，咽赤炁唯多无数，常闭目微咽之也。须臾赤炁绕身，都变成火，火因烧身，身与火共作一体，内外向光，良久乃止，名曰日月炼形，死而更生者也。又暮卧常当为之，则必长生不死也。又数存咽赤炁，使人颜色返少，色如童女。此不死之道，明堂之要诀毕也。旦起皆咽唾三十过，以手拭面摩目，以为常存唾色作赤津液。

洞房中有三真，左为无英公子，右有白元君，中为黄老君，三人共治洞房中。此为飞真之道，自别有经，事在《金华经》中。

丹田中有上元真一帝君、帝君之卿，合三人，共治丹田宫，三元真一之道是也。此地真之要路，控乘龙车之经也。天真多官位，乐欲为地真人，地真人隐遁於官位，

不劳损於朝晏，故从容任适，随时而游，坐七舆以上造，步四炁於太无也。至於天真、地真，虽差阶小异，俱一真矣。地真人亦各安其所之，不愿复为云中官也。

玄丹宫有泥丸太一真君。丹田后却入一寸，为流珠宫。流珠真神，自别有经，司命之所行也。其道妙大，发誓用珠帛结盟，乃能付之。此经三百年一传，满五授止，不得复出。此太极公卿司命之道也。

玄丹宫在丹田之上，正房一寸，紫房绿室，朱烟满内，其中有泥丸太一真君，治玄丹之宫。太一真君貌如婴儿始生之状，坐在金床玉帐之中，着紫绣锦衣，腰带流火之铃。流火之铃者，无质而赤光，动之声闻十万里，盖上清中黄太一真人之宝铃也。左手把北斗七星之柄，右手把北辰之纲。北辰者，北极不动之星，谓之为辰纲也。正坐玄丹宫，向外，左右无侍者。无侍者，所以名之谓太一真君也。旦夕守诸三一讫，独后乃未存之。未存之者，先造其轻，后行其重也。夫头有九宫，请先说之。

两眉间上，其裹有黄阙紫户，绛台青房，共构立守寸之中左右耳。守寸左面有绛台，右面有黄阙，其九宫真人出入，皆从黄关、绛台中间为道。故以道之左右置台阙者，以伺非常之炁，伺迎真人之往来也。紫户大神，名平静，字法王。青房大神，名正心，字初方。形并如婴孩，各服衣如其方房户之色，手执流金火铃。守寸者，却入三分，名为守寸也。暮卧及存思之时，先存二大神，彷彿存见，仍三呼其神名字，毕，微祝曰：

紫户青房，有二大神，手把流铃，身生风云，侠卫真道，不听外前，使我思感，通利灵关，出入利贞，上登九门，即见九真，太上之尊。咒毕，乃可存思三一洞房九道诸要道也。

守寸二大神，唯听九宫中真官，在九宫内者，出入耳目，上帝信命。及玉童灵真，往来诣帝轩，二大神听以进。其余非真，此二大神皆不听进以前也，此中黄太一法度也。於是赤子帝君，乃命两耳神娇女、云仪，使引进之，故人觉耳鸣者，外使入也。云仪时扣磬钟，以闻九宫，使知外人来入，令警备也。磬钟者，是令耳鸣之声音也。其闻之者，错手掩耳，而咒曰：

赤子在宫，九真在房，请听神命，永察不祥，太一流火，以灭万殃。

咒毕，以手拍耳门二七遍，毕，当觉面热，即佳候也。若觉头项颈间色色寒者，恶炁入也。当急卧，临目内存玄丹宫太一真君，以流火之铃煥而掷之，令恶炁即出身，火光亦随之在后，炯炯然以照己一身，良久平复也。

耳中忽闻濑水声，雷电及鼓鸣者，是体中劳损，心藏极弊，不能味真注生，而淫放

丧乱，使六府失摄，魂魄哀号，盖将结疾病，致死亡之兆矣。是以泥丸纵法，九宫失常，悲扰翻错，鸣鼓乱行，将欲舍其居馆，以弃一身也。闻之者，当精思念太一真君，反迷还专真心，若罪未深者，自听改也。所以耳聋者，耳神亡之故也。

夫耳者，帝君之听门也；目者，太一之日月也；鼻者，三元之丘山也；口者，绛宫之朱渊也；眉者，白元之华盖也；发者，明堂之林精也；舌者，元英之龙轅也；齿者，胃宫之威刀也；手者，胆神之外援也，足者，肾元之灵关也；阴极者，洞房之真机也。夫一体百神，各有所属，不可不察，不可不慎也。

耳中忽闻金声玉音者，真炁来入，道欲成也。忽闻弦乐之声者，六丁玉女来卫子也，皆道欲成也。当隐静专修所行，勤至之心愈弥於往也。真人因是，遂有形见之渐矣。自非尔师，且勿言於他人。

耳中忽闻箫角之音，吉象贵至也。闻叫唤号呼之声者，凶象贱至也。鼻闻臭炁者，必有淹秽之事，不净洁之口验也，故以臭炁示之矣。急更沐浴烧香，扫除寝宇以答之，此是帝君将戒劝於人者也。若闻香炁者，是神官灵人在子之侧，视子之状也。其时当修诸好事，行德惠，拯穷困，布阴功，施慈爱，神官灵人还将告子於太上，道子之善否矣。道之微妙，不可不察，皆此类象也。闻香炁，自非尔师，勿告他人。闻臭炁者，当告人，以明己之犯罪，触秽之无状矣。若闻血气，及无故见聚血者，兵凶也。急隐遁人间，守三元帝君求救，自藏斋三月，祸亦止也。此皆帝君先告人之吉凶，以令惧戒其祸福耳。夫见凶象，当行阴德，营惠救人，为人所不能为，行人所不能行者，始免乎必死之候也。子其勸之，勿守常而已。

两眉间上，却入三分为守寸双田，却入一寸为明堂宫，却入二寸为洞房宫，却入三寸为丹田宫，却入四寸为流珠宫，却入五寸为玉帝宫，明堂上一寸为天庭宫，洞房上一寸为极真宫，丹田上一寸为玄丹宫，流珠宫上一寸为太皇宫。凡一头中有九宫也。

其明堂、洞房、丹田、流珠四宫之经，皆神仙为真人之道，道传於世。其玄丹宫经，亦真官司命之要言，四宫之领宗矣。此一经须太极帝君告可与，乃与之也，亦时出授耳。凡合五宫之道，行乎世上，有真名者，遭值之矣。自非骨相挺命，不闻此言也。

又有玉帝宫，有玉清神母居之。又有天庭宫，上清真女居之。又有极真宫，太极帝妃居之。又有太皇宫，太上君后居之。此四宫，皆雌真一也，道高於雄真一也。并有宝经，以传已成真人者，未得成真，非所闻也。雌真一之要，亦自不授之矣。太上所以出极八景，入骖琼轩，玉女三千，侍真扶轅，灵妃侠唱，神后执巾者，寔守雌一之道，用以高会玄晨也。此太上之宗根，虚皇之所传也。此四宫人皆有之，但不修此道者，宫中空耳。夫不尽修於九宫者，宫中空耳，非但雌家四宫而已。至

於丹田宫中常有帝君，守寸常有大神，不复间，须修乃见在宫中耳。修之者神仙，不修者以寿死矣。雄雌一神者，男女并可兼修之，无不在也。唯决精苦之至，乃获益矣。

守玄丹太一真君之道，暮夕静寝，去诸思念，坐卧任意，先存北极辰星紫炁，来下入己玄丹宫中，须臾满宫，溢出身外，使匝身，通洞内外，与紫炁合体。毕，又存日来入玄丹宫中，日满宫内，在紫炁中央，望视如暗中视火珠之状。毕，乃存上清中黄太一真君，从北极紫炁中来，下入玄丹宫日中坐。君讳规英，字化玄，衣貌服色如上。又存己一身，忽然升上，入玄丹宫日中，在太一真君前对坐，服色任意。因心起再拜稽首，膝前问道，求神仙长生，随意言之。因乃存吞紫炁三十过，毕，咽唾三十过，毕，又存北斗七星内，有一赤炁大如弦，径下直入玄丹宫，於是太一君及己，俱乘日入行赤炁道中，直上诣北斗魁中，寢息良久。自因此寢也，亦即有真应。十四年行之，则与太一同游，俱到七元之纲也。十八年，诣上清宫，受书佩符后，役使玉童、玉女各十八人。一夕一存之，唯数而已，勿令脱夕。亦可专修此道，不必须守三一也。兼之益精，至感速耳。

月一日、三日、七日、十一日、十五日夜半之时，存玄丹宫中太一真君，正坐向外，口吐青炁，下入我口中，我随咽之，凡五十过，毕，乃咽唾五十过，毕，微咒曰：

太一真黄，中黄紫君，厥讳规英，字曰化玄，金床玉帐，紫绣锦裙，腰带火铃，斩邪灭奸，手把星精，项生日真，正坐吐炁，使我咽吞，与我共语，同宴玄丹，练濯七魄，和柔三魂，神灵奉卫，使我飞仙，五藏自生，还白童颜，受书上清，司命帝官，所愿所欲，百福维新。

又存己上入宫中，在太一前寢息也。因以取眠，亦当梦感妙应矣。日为此，而数积，有相见之阶渐。

四宫雌真一内神宝名玉诀

凡学上真之道，而不知雌真一之内名，亦万不得仙也。学者受师口诀，然后奉行。

每以正旦、月朔、太岁本生之日，入室东向，思存玉清神母，姓廉名，字荒彦，长九寸九分，着玄黄素灵之绶，头戴七称珠玉之髻，冠无极进贤之冠，居无上之上，太极朱宫中，七宝之府五灵乡玄元里，下治兆身玉帝宫中。

上清真女，姓厥名回，字弼，长六寸六分，着青宝神光锦绣霜罗九色之绶，头戴玉宝飞云之髻，冠玄黄进贤之冠，居无上之上，太上昆仑太幽宫中，明堂府九光乡大化里，下治兆身天庭宫中。

太极帝妃，姓玄名虚生，字伯无，长七寸七分，着玄罗流光五色凤文绶，头戴七宝玄云之髻，冠无极进贤之冠，居元景之上，太清极玄宫中，玉房府三丹乡丹元里，下治兆身极真宫中。

太上君后，姓迁名含孩，字合延生，长三寸三分，着七宝飞精玄光云锦霜罗九色之绶，头戴九玄玉精颓云之髻，冠玄黄无极三宝玉冠，居太清九玄之上，洞元极真宫中，丹精府云光乡玄玄里，下治兆身太皇宫中。

行玄丹之道，守三一之诀，当常守四宫雌真一之神，衣服、形影、名讳、乡居所在。此宝经之上篇，以传见真人者，始学不得参闻。其要素灵所秘，不行於世。凡受上真之法，三宝神经，虽通灵究幽，不知雌真一之法，亦万无成矣。故太上标其重禁，格於轻泄，不载於纸墨。有者宜各审实内心，然后受焉。

每以正旦、月朔，及太岁本生之日，沐浴清斋，烧香入室，东向存思四宫雌真一之神，乡居、姓名、服色、长短，如上法。毕，当叩齿三十六通，咒曰：

太真阴神，号曰女灵，变景九玄，乘真隐冥，日吉天朗，告斋上清，心念目瞩，洞鉴神形，还守宫宅，玉华芳盈，五色变化，流黄紫青，运致飞霞，上造帝庭。

毕，咽炁三十六过止。如此毕九年，面生玉华，金真映光，神见躯形，与兆共言。子既见神，心知而已，慎勿妄传。

此四宫雌真一之神，是天元始生之阴官，受号帝妃也。其元炁未立，五正未闻，光景未通，无极虚无，无上无下，无外无内，无左无右，无前无后，太上之元精，玄始之妙真，虚极之先，结炁而凝，混化万物，天地得存，皆由於四真也。能有至心存思者，千龄不知老，九天之中，万神同寿也。

太上太极帝君真符宝章

太微天帝君受传金阙帝君。

此太极帝君真符，上元六符，中元五符，下元五符。太上召三一守形之法，立春、春分、立夏、夏至、立秋、秋分、立冬、冬至始日，朱书，平旦向王，服一符，以次十六日，竟服十六符也。后节复如先，从上起服也。服符悉向王再拜，咒曰：

上元一真，守固泥丸，中元一真，安神绛宫，下元一真，卫我命门，三元齐景，保命长存，招灵致炁，坐降自然，变形练髓，骨化成仙，毛羽飞罗，腾翔帝晨。

又朱书符，盛以锦囊，佩於头上，勿履洿秽。服符五年，得与真人相见，九年通灵彻视，坐在立亡，役使六甲，天给玉童玉女各十二人，乘云驾龙，游宴玉宫。

此太上宝章，传太帝君，太帝君传天帝君，天帝君传太微天帝君，太微天帝君传金阙帝君，金阙帝君传东海青童，以封掌名山，召制五岳。以朱书素，佩之左肘，勿经洿秽。佩之八年，三一俱见矣。正月旦，青笔书一符，北向再拜，吞之。三一相见之后，以金为质，长九寸，广四寸，厚三分，刻而书之，以封山川之邪神，掌五岳之真精也。临时三元真一君，当悟兆施用节度，神真之道，服符北向，叩齿三十六通，因仰咒曰：

三真守房，元老固精，天地混合，二炁交并，帝君威策，命童摄灵，封山召海，摧灭群生，促诣北帝，条列魔名，检统无横，速还鬼营。

毕，佩符封山召海，制御万灵，役使禽兽，伏诸天兵，游行五岳。临时皆当先叩左齿三十六通，存七星覆兆身头上，口吐赤炁，冠满一域，四面洞匝，焚烧内外，无复子遗。见己身在火中央，须臾，有五岳神官，及山野之兽，来朝己身，便咒曰：

元始出令，宣告万灵，太真帝章，与炁俱生，自下总统，悉归上清，若有不反，收摄真形，封山召海，应令摧倾，速来自伏，不得稽停，急如正律，无令越冥。毕，咽三十六炁止。

太上大洞守一内经法

太上曰：真人所以贵一为真一者，上一而已矣。一之所契，太无感化，一之变通，天地冥合。是以上一为一身之天帝，中一为绛宫之丹皇，下一为黄庭之元王，而三一之真，并监统身中二十四炁，炁以受生，生立一身，上应太微二十四真，真炁徊和，品物成形，玄神混分，紫房杳冥。夫炁者，结灵烟而成神也。神者，托三一以自王也。变化者，三一之所造，得化者皆由神以自隐，混黄相成，得玄之极。三一元君，各有真炁，真炁结成，自为千乘万骑，云车羽盖，常以内入紫宫，以登玉清，列策元图，伐胞保胎。三一养身，得为真人，飞行九霄，受事高上。所以一之所济者，乃生乎天地也。非但飞行蠕动，小事而已。子若能守之弥固，则精应感畅。精应感畅，则三元可见。三元见，则白炁郁变。白炁郁变，则混分自生。混分自生，即千乘万骑，忽焉至矣。於是羽盖可御，云辇可乘，尔乃白日升天，上造太微，寔三一之玄功，精感之所会也。太微天中有二十四炁，混黄杂聚，结炁变化，有时忽尔而分，觉然而生也。化炁中生有二十四真人，结虚生成，不由胞胎，皆三一帝皇之炁所致，分道变化，托玄立景矣。既能守身中三一，则太微天中三元帝皇之真君，而降见於外，亦与子面言也。身中复有二十四真人，亦体中玄炁精灵所结而造致，分化而造万也。若云辇既致，合炁晨景，以登太微。太微二十四真人，俱与身中神明，合宴於混黄之中，共景分於紫房之内，托形炁於千涂，回老艾以反婴，改死籍於北酆，受长存乎帝乡，出入玉清，寝止太微。又当兼行帝一、太一五神，及三五七九之事，兼行之者，而一神之感致易也。紫房须守一为根本，守一须紫房为华盖，故三一三素相须也，而紫房六合相待也。虽其居不同，而致一之用俱济也。子善思而存之，则三一之事毕也。若单得受一道者，则三元不备，但注心於一，亦可长生不死，得入太清而已，不得游景太微之天，北登上清之宫也。

上一真帝之极也，中一真皇之至也，下一真王之妙也。天皇得极，故上成皇极。地皇得至，故上成正一。人皇得妙，故上成众妙之君。三皇体真以守一，故一无藏形。仙人寻真以求一，故三一俱明。一无藏形，其真极也。三一俱明，得一而已。其真既极，三一既明，得一而生也。夫真守一者，当令心寂神凝，体专求感，所以百念不寻，精意不散，三月内视，注心一神，则神光化生，缠绵五藏。所以注向不散，专炁致和，由固之至也，得一之效也。若华伪漚兴，竞心乱生，故一不卒感，神不即应，非不欲往，存之者不专，思之者不审，故起积年之功，罔有彷彿也。若能心济远感，专心无他，亦不必三月之精思，与一混合也。

太上告曰：三元者，九天之玉真，上真之正道也。胎根之所生，六合之所存，故正一大道，以出真帝，正道玄真，以生大神，离合五老，万化忽成，三元解变，则一之所生也。故变炁布结，神得以灵，众真归一，而玄功成焉。此正道之祖宗，元炁之根始也。散之於无，则白炁杳合，养之於形，则长生永久。夫三一之法，观道备於三元，其道奇妙，总合灵篇，天人仙皇，握宝神经。第一之奇，《大洞真经三十九章》；第二奇文，雌一合变，号《大有妙经》；第三玉诀，洞真玄经，三五七九

，号《太上素灵》。是故上一帝君宝《大洞真经》，中一丹皇宝《雌一妙经》，下一元王秘《素灵洞玄大有妙经》。此三五之号，真道之至精，三一之极章，并玉清之禁诀，高上之秘篇。兆守三一，得吾三经，即能乘云上升太清，洞观无穷，游宴紫庭，微哉探矣，难可文宣。守一所生，三一见矣，子既得一，自得此经。守三一之法，皇天上清金阙帝君真书之首篇，高上之玉道，神仙之津涂，众真之妙诀。子能守一，一亦守子；子能见一，一亦见子。一须身而立，身须一而行。子身进退，千端万事，常当念一，饮食念一，欣乐念一，哀戚念一，疾病念一，危难念一，履水火念一，有急念一，举止瞩目，念亦多矣。思念必专，不专无冀矣。患人有志不固，固不能久，知一名字而不能守，守不能坚志，志不能苦。思念无极，多有本心。或知一之道，不能常守，故三一去，则正炁离。夫失正炁者，则故炁前，故炁前则死日近也。俗人学道，多寻浮华，不以真一为贵，初虽有其志，后必变败，皆由用志不一，邪炁来入故也。守一之戒，戒於不专，专复不久，久不见精，精不能固，固而不常，则三一去矣，身为空宅耳。空宅无主，其祸安久。

太上告曰：炁结为精，精感为神，神化为婴儿，婴儿上为真人，真人升为赤子，此真一也。

太上告曰：天有三光，谓日月星也，亦为三精，是用长生。人有三宝，三丹田也，亦为三真，是用永存。灵宝经曰：天精地真，三宝常存。此之谓也。

太上告曰：两眉间，上丹田也。心绛宫，中丹田也。脐下三寸，下丹田也。合三丹田也。赤子居上丹田宫，真人居中丹田宫，婴儿居下丹田宫。两眉间上，却入一寸为明堂，却入二寸为洞房，却入三寸为丹田泥丸宫。却入者，从面却往就顶后之背也。

丹田泥丸宫，正四方面各一寸。存紫炁冲天，紫炁中有日象，圆九寸，外映照九万里，我形变化，大小暂见，倏欻忘身，亦在意存之，上元赤子，居在泥丸宫中，华盖之下。泥丸天帝上一赤子，讳玄凝天，字三元先，一名伯无上，一名伯史华，位为泥丸天帝君，治在上一宫。其右有帝卿一人，坐相对，是我齿、舌、脑之精神，升化而忽生也。上一为帝卿君，讳肇勒精，字仲玄生，一名起非，一名常扶。此二人共治泥丸宫中，并裸身无衣，貌如婴孩始生之形。上一天帝君执上清神虎符，盛以青玉函。帝卿执《大洞真经》，盛以紫玉函。坐俱外向，或相向也。上一帝君口吟曰：

玄玄泥丸，生身保关，太一守籍，上元固神，天常真炁，养形成仙。毕。

上一所居之宫，内以镇守泥丸、面、目、口、舌、齿、两耳、鼻上所居之宫，毛发之境，外以威震除六天万鬼，凶恶之魔也。兆身中三魂七魄，五日一来，朝上元帝一，而受化混生混炁之道矣。

心为中丹田，号为绛宫，镇心之中央，正四方面各一寸，朱烟参天，朱烟中有日象，径七寸，外映照七万里，我形变化，倏欬忘身，恍惚在意存之，绛宫心丹田宫，中一元丹皇君处其中。中一丹皇，讳神运珠，字子南丹，一名生上伯，一名史云拘，位为绛宫丹皇君，治在心宫。其右有辅皇卿一人，是五藏之精神，合炁结化而忽生也。入绛宫为辅皇中卿，讳中光坚，字四化灵，一名幽车伯，一名董史华。此二人共治绛宫心中，并裸形无衣，貌如婴孩始生之形。丹皇君左手把荧星，存之如鸡子正中央色，右手执雌一高上符，盛以白玉函。辅皇卿君左手执明月珠，圆三寸，光明洞映。坐俱外向，或相向也。丹皇中一君口吟曰：

五藏光明，由炁得生，太上八景，洞观心庭，中一帝皇，保命常宁。毕。

内以镇守筋骨、五藏、血肉之境，外以震消万邪之不祥，养炁安神，长生久视，飞仙太清，上与天相极。兆身中三魂七魄，七日一来，朝中一丹皇君，而受分形散化之炁，混合胎神之景也。

脐下三寸号命门丹田宫，下元婴儿居其中，宫正四方面各一寸，白炁冲天，白炁中有日象，圆五寸，外映照五万里，兆形变〔化〕，倏欬忘其形，恍惚在意，存之命门，下一黄庭元王处此宫中。下元婴儿，讳始明精，字元阳昌，一名婴儿胎，一名伯史原，位为黄庭元王。其右有保镇弼卿一人，是阴jing精炁，白珠津液之守神，乃结精回烟，升华而生，忽然成人，位为弼卿也。入在丹田宫弼卿，讳归上明，字谷下玄，一名奉申伯，一名承光生。此二人共治丹田下元宫中，并裸身无衣，貌如婴孩始生之形。黄庭元王口吟曰：

玉jing白珠液，结凝成百神，养形五老符，拔籍太上轩，命门不可倾，金液不可愆，回精自满塞，勿漏玉髓泉，生死皆所由，闭之乃神仙。毕。

下一君左手把太白星，存之如鸡子色正白，右手执《素灵洞玄大有妙经》盛以黄玉函。弼卿左手执明月珠，圆三寸，映洞下关玉jing之内，右手恒执兆之玉jing，常持之不放。坐俱外向，或相向也。内以镇守弼卿，兆下关、四支、津液、骨髓、百窍、肠胃、膀胱之府，外以长生不死，消灾散祸，辟却万邪，绝灭三虫。三魂七魄，一日三来，朝下黄庭君，受闭精养炁，结炁为仙，从仙得真，从真得玉虚之道也。存白炁日象之法皆如上，但色同而日大小为异耳。存念之时，皆以生炁时，坐外任意也。存三一安其宫，竟周一日，夜半辄复更存耳。常当烧香左右。

守一之法，至立春之日，夜半之时，正坐东向，服炁九通，咽唾五过。毕，乃存北斗七星冉冉来下，在我顶上，却向天，以杓柄正向前指东也。良久，咒曰：

太上玄刚，守一神仙，万魔消灭，身乘玉轩，鬼试不行，度福玉晨，玉真人，携我在前。毕。八节日皆存如此，以辟守一之试校。

有是大洞守一内经者，即为师也。受经者，则为弟子。所以崇建本之尽着，明大诚之苦至，期神灵之所崇，托阶级以自始。所以师友理其外，三一镜其内，帝君欣其宫，赤子悦其宅。於是紫房秀霄，丹田曜焕，五老降其室，玉华憩其寝，将必神登太霞，信济空洞，体合妙灵，白日升天。违是道者不全，泄是禁者身残，闻此道者延年，行此道者神仙，可不慎与？若本命之日，自可白日存之，唯敬勤耳。

夫自非宿有仙骨玄篆，及金阁玉字，亦自不得闻见真一之妙道也。或宿世行善，功满五百，或慈心至德，仁及鸟兽，或本命运遇与神合会，诸如此者，得真一也。

若始存守一，未能究三宫之节度，咽炁祝吟之旨者，自可按本文，白日而行之。初亦宜熟读预习之，於临目存思为易也。夫泥丸天帝三一君者，乃一神之灵宗，百神之命根，津液之山源，魂精之玉室。是以胃池体方而受物，脑宫员虚而适真，万穴植立，千孔生烟，德修天地，混同太玄，故名之曰泥丸者，躯形之上神也。兆唯知吞炁咽唾，鸣齿纳液，而不知此所因者，乃泥丸之流末，脑家之边枝耳。今将告子趣彼守一之秘术，得为上仙之真人。弟子受者，斋四十五日，毕乃传。用青缯三十尺，金环三枚，以为洞一之约，勿宣之盟誓矣。经师受此盟物，以待林泽山栖穷乏，以投行路急病之困，不得妄用贍己之私矣。违而不奉，死为下鬼，受风刀之考。父子传授，亦盟如科，传授此经，厚相师友，此天人之法也。服膺一教，丹心奉一为厚，受教问津为弟子，有经保法者曰师也。两端有问者，则非守一之才也。

守一之法，依前至八节之日，夜半之时，正坐东向，服炁九通，咽唾五过，毕，乃存北斗七星冉冉来下，在我顶上，却向天，以杓柄正向前，指东阳明、阴精二星在后面，玄冥、真人二星在前面，於是仿髻存念位定。又思三一之尊君，忽乃变生，共出在斗魁之中，须臾，三卿君复生如三尊，须臾，见六人俱登玄冥，刚行东去，达天关而止，俱向我口。又存见上元手扶上卿，中元手扶中卿，下元手扶下卿也。我乃咽炁一通，良久，上元二人从炁中来入我口，上升还泥丸宫。次咽炁一过，良久，中元二人从炁中来入我口，下回绛官中。次咽炁一过，良久，下元二人从炁中来入我口，下回还入下丹田中。存天关星，令去口七尺，令对口前，三一入我三宫中。都毕，乃精念真一君各安所在。坐卧思之在心，心有所愿事，心启之，所求者亦心启求之。存思唯令静寂，静寂寢室，昼日亦可存思。

立春存三一，东向立；夏存三一，南向立；秋存三一，西向立；冬存三一，北向〔立〕，并如立春精思。

至春分日，沐浴清斋，夜半时入室烧香，东向叩齿九通，冥目存我身中三宫三一、三卿及我，合七人，我在中央，俱乘紫炁之烟，共登北斗阳明星。阳明星者，北斗之东神也。於是存入星中共坐，吞紫炁三十过。行之久久，自见阳明星东元太上宫，宫中有青玄小童，授子真光也。皆悉先存北斗星下，紫炁大如弦，从上直注我前，然后乃存三一也。存思毕，乃微祝曰：

五方命斗，神致七星，三尊凝化，上招紫灵，六神徘徊，三丹宫城，玄通大帝，下洞黄宁，天真保卫，召引六丁，神仙同浮，乘烟太清，四体坚练，五藏自生。毕。

至夏至日夜半时，入室烧香，叩齿十二通，南向冥目，存我身中三宫三一、三卿及我，合七人，我在中央也，俱乘紫炁之烟，共登北斗丹元星。丹元星者，北斗之南神也。於是存入星中共坐，吞紫炁三十过。行之久久，自见丹元星南极太上宫，宫中有朱阳灵妃，授子绛书宝衣也。存思毕，咒如上法。

至秋分日夜半时，入室烧香，平坐西向，叩齿十二通，冥目存我身中三宫三一、三卿及我，合七人，我在中央也，俱乘紫炁之烟，共登北斗阴精星。阴精星者，北斗之西神也。於是存入星中共坐，吞紫炁三十过。行之久久，自见阴精星西元太上宫，宫中有白素少女，授子玉童虎书也。存思毕，咒如上法。

至冬节之日夜半，入室烧香，平坐北向，叩齿十二通，冥目存我身中三宫三一、三卿及我，合七人，我在中央也，俱乘紫炁之烟，共登北斗北极星。北极星者，北斗之玄神也。於是存入星中央共坐，各吞紫炁三十过。行之久久，自见北极星北元太上宫，宫中有玄精真人，授子金书秘字三五顺行。存思毕，咒同上法。

存思令三一各安本宫，又叩齿二十四通，仰祝曰：

三尊上真，太玄高神，阳明主春，万童开门，丹元主夏，朱紫合烟，阴精主秋，天威六陈，北极主冬，万邪塞奸，五土庚壬，戊己天关，所摧皆灭，所向莫干，练我七魄，和我三魂，生我五藏，使我得真，飞登上清，浮景七元，长生顺往，啸命千神。毕。

此四节亦共此一咒，然上达学士，至一节行事，亦并思四节也。始学者至一节便单行也。此三元真一妙法，法传上真之士，不传中仙之才也。有此文而未获修行，朝夕礼拜，烧香供养，三一亦常在子身也，亦为子禳灾辟恶，消却不祥，但不致於云舆耳。

太上告曰：三一之真，易而致感，精思苦念，三月不倦，三一便见真形对言。人之为学，皆有先志而未怠，初成而中替，悉由有志而不坚，坚而不固，便致不应。天不欺人，示之以响，地不欺人，应之以影。响不至，神便远也。此岂天真不验，由於子身尔。

凡修守一之道，皆当先行帝君素语之咒，以理六府之关，开莹幽机，令赤子定宅，芳芝流溢，神华内生，於修守一，易为真感。其道秘妙，得者神仙，修行九年，白日升天。

太上三九素语内咒诀文

上清丹灵素语者，皆帝君之素咒，以理九孔，通鲜三宫，故号三九焉。每以本命之日，及修行众经之时，皆先烧香左右，整束法服，入室平坐，冥目阴咒，百日之中，则炁何神畅，赤子欢悦，真灵下降，面发玉泽，体生奇光，洞澈幽微，与神共言。如此九年，乘云飞行，游宴太清也。

太帝君素语内咒第一

静室独处，平坐东向，叩齿九通，冥目阴祝曰：

苍元浩灵，少阳先生，九炁还肝，使我魂宁，幽府结华，藏内鲜明，炼容固髓，返白为青，神化内发，景发紫庭，敢有犯试，摧以流铃，上帝玉篆，名上太清。毕，因闭炁九息，咽液九过止。

天帝君素语内咒第二

正南向，冥目叩齿三通，阴咒曰：

赤庭绛宫，上有高真，三炁归心，是我丹元，腾我净躬，径奏以闻，心固神静，九灵闭关，金真内映，紫烟结云，太微绿字，书名神仙，飞行上清，朝谒帝尊。毕，闭炁三息，咽液三过止。

南极上元君素语内咒第三

正西向，冥目叩齿七通，阴咒曰：

素元洞虚，天真神卢，七炁守肺，与神同居，保练玉藏，含华秀敷，澄诚明石，游御玄虚，玉字金简，九帝真书，使我飞仙，死名已除，游洞三清，适意所如。毕，因闭炁七息，咽唾七过止。

太微天帝君素语内咒第四

正向本年命之上，冥目叩齿十二通，阴祝曰：

黄元中帝，本命之神，一炁侍脾，使我得真，宝藏生华，结络紫晨，变景炼容，保命长延，后物而倾，千神来臣，老君玄篆，书名神仙，长生久视，与天同存。毕，因闭炁一息，咽唾十二过止。

后圣帝君素语内咒第五

正北向，冥目，叩齿五通，阴祝曰：

玄元北极，太上之机，五炁卫肾，龟玉参差，宝华结络，胃藏朗开，着名玉札，年同二仪，上皇太帝，峙然不迷，役使六甲，以致八威。骖龙驾浮，超然升飞，吐纳神芝，历劫不衰。毕，闭炁五息，咽唾五过止。

众真素语内咒第六

还东向，存五方之炁，都毕，又咽唾九过，叩齿九通，毕，北向再拜，阴祝曰：

谨白太上太极四真君，请存五方五帝五灵神，刻其绿字，骖驾十天，万祿束炁，众邪绝烟，使某相见，得其语言。毕，乃精思。

太上曰：凡欲修行经方，存念神真守一之法，不先通释三宫，开明九孔，调理五府，然后修行，则神炁不欢，真灵不降，亦徒劳於精思，无益於自补也。有志者精行其事，五方素咒讫，还存思炁理和调，内神欣喜，影响相对，无不朗然也。兆勤勩之，必得神仙，至妙上法，非贤不传。

凡修长生之道，白日升晨之法，每当清斋苦念为先。故至人之学，望云霞而致降，思虚无而致感者，岂复虚谬哉。天道玄默，望之泯泯，子既有心，安存子身，决由精诚，守固握真，道不期远，正存数年，与炁相应，道便降焉。此太上之妙诀，得者神仙。

凡学当从下上，按次而修，不得越略，亏天科条。经有三品，道有三真。三皇内文，天文大字，九天之策，黄白之道，亦得控轡玄霄，游盘五岳，故为下品之第。灵宝洞玄，亦元始俱生，渊泉深奥，妙趣洞源，斋净芳兰，五称映玄，拔度七祖，解释罪根，亦致真人下降，飞腾太清，中品之妙，下方地仙。上清道经，太丹隐书，凡三百宝名，玉诀九千，此上真之首目，玉帝之内篇，得者名参玉简，录字青宫，白日升晨，上造帝堂，上品之诀，秘在九天之上，大有之宫。夫学当从下品，造於上清也。道有三奇，第一之奇《大洞真经三十九章》，第二之奇《雌一宝经》，第三之奇《太上素灵洞元大有妙经》。此传已成真人，不传於始学也。忽遇因缘，得见篇题，不得便妄披於灵文，皆当先练涉学，然后造真，道无不备，万无不仙，学者详而奉之，勿亏此言。

学道不先备科而学，亦万无成也。科以制犯，知科便改，自然应真也。《太真科》有九品，品有十二条。《九真科》有三品，品有九条。《四极明科》有四品，品有二十四条，诚於轻重罪福之制。故学者宜先寻之，此科亦单行於始学，不必悉备於

众经也。

《太上素灵大有玉篇九真明科》，皆传骨相合真之人。依上皇之初旧〔科〕，经万劫一传。三天立正，改七千年听得三传，七百年内有其人，亦听三传。按科赍上金三两，紫纹百尺，青缯二十七尺，赤丝五两，沉香一斤，丹一两，诣师造斋百日，或三十日，上誓九元北帝太灵万真领仙玉司，以为盟信誓约。宝秘修行灵文，不得轻泄宣灵神真，愆盟负科，殃及九祖，考挞死魂，长闭地狱，万劫不原，身没形残，终不得仙。

凡受《素灵洞玄》，当依年限而传，过此不得复出。若道备真降，白日超腾，乃隐化托懈，灭迹去世，有可付弟子，便口盟而授也。若无其人，当与经俱升虚室，无留下世，使人见闻。犯者殃谴累身，学者慎焉。

凡受三宝神经，常当清斋别室，烧香，朝夕礼拜，如奉君父，不得冒秽履淹，轻慢宝经，为玉童所奏，玉司所执，身被风刀之考，殃延九祖，祸灭於身，自然失经，终不得仙。

太真隐朝求仙上法

凡受《素灵洞元大有妙经》，施行上诀，常以月一日、十五日、二十五日，一月三过，隐朝元始天王、太真丈人、九天真王。其日沐浴，入室烧香，北向六拜，长跪，叩齿三通，咒曰：

上启元始天王、太真丈人、九天真王，小兆王甲今有言，谨以吉日，拜礼上天，乞愿神仙上名玉篇，骨生玉髓，肉化金真，丹芝玄注，室生紫烟，神藏结络，内景胎仙，身履万劫，长侍帝晨。

毕，起再拜，亦可心拜。又叩齿三通，咽唾三过止。此隐朝求仙上法，修之七年，真灵见形，对景寂室，与子共言。朝不亏日，克得飞仙，乘空驾虚，白日升晨。

太上九真明科

三品律

太上告诸天帝王、后圣帝君、上相青童、太极真人曰：凡是后学，得见上真三洞宝章秘经首目者，皆东华书名，金字上清，虽未超腾控辔紫庭，皆是升度之人也。然虽见此文，而不知《九真明科》条检仪式，三洞奇文太上真宝书，不可得而便披也。明科宝秘，藏於玄都之宫，玉京金房之内，不传於世。此乃明三洞之渊赜，标众真之仪格，拔宿对於幽宫，度七祖於仙籍，业总络於万道，解九阴之重责，其妙可得立用，其科可以肃励。今故标出三品篇目，以称扬三奇素灵妙经，可诫於后学，使勤尚之人，告慎於宝科也。

诸天帝王、后灵九玄帝君、上相青童、太极真人，稽首敢问太上天尊：至真上法，高秀玄澄，弥络万宗，玄寂虚凝，妙趣激朗，法化三乘，弥纶亿劫，量何可胜任，岂复稽於明科乎？

太上曰：善子之言。夫后生之徒，自非玉虚之胤，结自然而生者，皆孕於混沌，染系於器秽也。结有不纯之行，性有不专之美，虽玄慕玄赜，故心常背我，举止所乘，莫不犯於过，过生乎外，命灭乎内，承此而学，岂不去真远矣。如使三官执咎，对在幽司，考延七祖，罪累於身，有犯斯过者，而使悟於玄科有纠罚之制，圣化之大，复许有赎罪之法，案科而用，如此期真将必近矣。为学之士，而无此检，亦徒劳於精思，无益於苦念也。今故标出九真三品明科，自可授於后学应为真人者。

帝君、上相青童、太极真人，於是退斋上清，奉受《素灵大有妙经九真科检》，秘於金藏玉匮，卫以玉童玉女各三千人，侍典灵文，散香虚庭，飞龙毒兽，巨虬千寻，奋爪云墙，备卫玉关也。如是十天大圣、九宫真仙，一月三过，莫不上登玄宫，

禀承明科，礼拜於灵文也。

上相青童君曰：凡有金骨玉髓，名参青宫，得有此文，秘而施行。於是承受之仪，玄合上典，施用节度，与真同功，赎罪拔难，宿结咸解，七玄之祖，於是而欣，己身升腾，上宴玉京也。

玄都九真明科上品传经篇

玄都上品第一篇曰：《大洞真经》、《雌一宝经》、《太上素灵大有妙经》，三奇之章，高上玉皇宝篇，秘在九天之上大有之宫，太玄灵台玉房之中。上皇之初旧科，经万劫一传，三道正明，学真日兴，高上正科，七千年内听得三传。侍卫玉童、玉女各七千人，执香典灵。按科传授之法，皆对告斋百日，分金钮为盟，给玉童、玉女，依《四极明科》。不依科而传，罪延七祖，幽魂充役，吞火食铁，负山运石，以填无极之源，己身抱风刀之罚，身没形残，长闭地狱，万不得仙。

玄都上品第二篇曰：传《大洞真经三十九章》於后学者，誓以上金十两，铜二十五斤，金钮五双，金鱼、玉龙各一枚，青丝一两，缠钮为盟。《雌一》，以上金五两，五色纹绶各五十尺，香一斤，金钮三双。《太上素灵洞真玄经》，上金三两，紫纹百尺，青绶二十七尺，赤丝五两，香一斤，丹一两。上皇以信誓心，不得有阙，阙则亏科。师犯则迁侍经玉童、玉女还於本宫，不过三年，身被风刀之考，自然失经。受者不依明科，皆失明形残，七祖、父母，充北酆之责，万劫还生非人之道，学者慎之。

玄都上品第三篇曰：凡有金名东华，玉字上清，得受《太霄琅书琼文帝章》、《紫度炎光神玄变经》、《上清变化七十四方》、《九真中经》、《丹景道精隐地八术》、《解形遁变流景玉经》、《七变舞天》，皆九天真王、元始天王、太上天帝君、中央黄老君，受於太空之中，九玄之内，虚无之高章也。皆秘在太上灵都之宫，紫房之内，三元君主之，侍卫玉童、玉女皆三千人。元始之初，经七千劫一传，自三道立正之后，七千年内听三传，七百年中有其人，亦听传。传皆对斋九十日，或三十日，或九日，告盟而授之。给玉童、玉女，依《四极明科》。若不依科而传，罪延七祖、父母，充责鬼官，运蒙山之石，填积夜之河，万劫还生非人之道，己身被风刀之考，自然失经，终不得仙。传者慎之。

玄都上品第四篇曰：传《琼文帝章》，赍金鱼、玉龙，青绶三十二尺，金钮三双之誓。《紫度炎光》，五色锦各五十尺，上金五两，沉香五斤，真朱一斤，书刀一口，金龙七枚，绛纹七十尺之誓。《上清变化七十四方》，青绶四十尺，上金十两，金钮六双，好香一斤，金鱼、玉龙之誓。《九真中经》，旧科落发为盟，今以白绢九十尺准盟，法於九真之数。青丝一斤，绛纹二十四尺，此日晖之誓；碧绶二十四尺，月华之誓；金环三双，无常童子负变之信。《丹景道精隐地八术》、《解形遁变流景玉经》，悉上金十两，金鱼、玉龙各一枚，青绶四十尺，紫纹四十尺，金环各三双。《七变舞天》，上金五两，朱一斤，青绶三十二尺之誓。信以质心，不得有阙，阙则违科。师以天信投於山栖，以救穷乏，余以供营经书之具，不得他散。师犯上科，夺玉童玉女，减算夺纪，注名度还北酆。受者不依科，皆丧魂失神，风刀之考，不出三年，自然失经，终不得仙。

玄都上品第五篇曰：传《消魔智慧》、《玉清隐书》、《宝洞飞霄绝玄金章》、《紫凤赤书八景晨图》、《金真玉光》、《灵书紫纹》、《金珰玉佩》、《金根上经》、《三天正法》，皆太上大道君、元始天王、金阙帝君之宝章，秘在玉清之宫，金房紫户之内，典卫灵文玉童、玉女各三千人。元始之初，皆千劫一传，自三天立正之后，七百年内听得三传，百年中有其人听一传，给玉童玉女。依《四极明科》，授者对斋九十日，或三十日，或九日而传。不依科而传，罪延七玄之祖，长充鬼役，无有解脱，己身被风刀之考，死充下鬼，万不得仙。

玄都上品第六篇曰：传《消魔智慧》、《宝洞飞霄绝玄金章》、《紫凤赤书八景晨图》，皆上金十两，玉札一枚，金鱼、玉龙各一枚，紫绶四十尺。《金根众经》、《灵书紫纹》，上金五两，金简、玉札各一枚，枚长一尺六寸，广二寸四分，金鱼、玉龙各一枚，紫绶百尺，青纹四十尺。《三天正法》，清绶三十尺，青布四十三尺，金环五双，以为密誓；上金十两，通神之信。《金真玉光》、《玉佩金珰》、《玉清隐书》，皆金鱼、玉龙各一枚，以为誓信。依科不得有阙，阙则师夺玉童玉女，注名还度北酆。受者皆丧魂失神，考以风刀，不出三年，自然失经，万不得仙。

玄都上品第七篇曰：传《七星移度》、《白羽黑翮飞行羽经》、《飞步天纲蹶行七元》、《太上隐书》、《灵飞六甲》，皆太上太帝君、太微天帝君登空之道，隐化之秘章，秘在太上琼宫之上，紫房之内，侍卫玉童、玉女皆三千人。依科七千年一传，三天立正之后，改七百年内听得三传，若百年中有其人便传。传授告斋九十日，或三十日，给玉童玉女，依《四极明科》。不依科而传，罪延七玄之祖，长充北酆鬼役，十苦八难，己身被风刀之考，身没幽源，万不得仙。

玄都上品第八篇曰：传《七星移度》，青纹三十一尺，绶绶七十尺，凤纹之罗九十尺，金钮一双。《白羽黑翮飞行羽经》，金二两，青纹三十二尺，以代截发歃血之誓。《飞步天纲》，锦三十尺，金鱼、玉龙各一枚。《太上隐书》金鱼、玉龙之誓。《灵飞六甲》，白素六十尺，金钿六双，青丝六两。天科以信质心，不得有阙，阙则违玄科。师夺玉童玉女，除落青簿玉名，移迁北酆。受者不依科，亡精丧神，罚以风刀，不出三年，向然失经，终不得仙。

玄都上品第九篇曰：诸方丈震灵，豁落七无八天隐文、流金火铃金神虎符、消魔支干夜照神烛、八天隐遁紫清玉符、五籍洞玄六甲上符、五行秘文、玄都玉格诸符，凡有六百部。太上悉以其文，标於旧经之内，以为立用。传授盟科，悉依经科，传受有阙，罪同上品。有经无符，则天魔害人；有符无经，则思念无感，神真不降。科云：皆不得单行，单行罪亦如之科。经及符本同出於自然之炁，虚无之章旨，故不可得独修也。无科修道，万不成也。

玄都九真明科中品诫罪篇

玄都中品第一篇曰：诸是后学，七祖以下有杀害人命，劫贼攻掠，谋图奸姦，篡逆之过，九族交通，谋反无道，其考尤重，怨对咎逮，积结九阴，非赦所原。后生皆不得以余殃之身，参染真经，窃受宝文。若有苦志，志尚自励，首谢七玄，重施功德，救出幽魂，披露己身於三光之下，散髻叩头，三年不倦，自赍重信，投於九江，赎解前迷，太上听得清斋百日，奉受宝经，然后行事。玉人天罪，而不先自罚责，吐首天宝，而受法者，师及弟子同被风刀之考，七玄之祖长闭幽源，负石担山，万劫不解，身亡失经，明慎之焉。

玄都中品第二篇曰：凡欲修学上法，己身先有重罪，手杀人命，及酷虐下贱，杀害众生，劫掠百姓，谋图奸宄，九族相交，妬贤能，伐逆师主，不赦之罪，积结九阴，皆不得参受妙法，修行经文。若能苦志，吐首先犯，效功施德，披露三光，散髻叩头，三年陈谢，罚信投河，以赎己愆，拔出七玄，使三界右别，然后听得清斋百日，奉受宝经行事。有此之罪，而不先自首谢，责罚自励，而受经文，师及弟子同受风刀之考，魂魄十苦八难，身没幽泉，自然失经，七祖、父母，长充幽涂，万劫不解，学者慎之。

玄都中品第三篇曰：凡是学者，受三奇宝文，上清秘经，而轻泄目录，以示不固，宣露妙秘，轻慢宝章者，一犯〔至〕十，罚功断事三年，然后得更清斋修行。过此以上，皆罪结九阴，考延七祖，充役三涂，运石负山，十苦八难，经万劫得出还，更生不人之道，己身罚以风刀之考，失明形残，死充下鬼，万不得仙，奉者慎之。

玄都中品第四篇曰：凡是学者，受上清宝经，三奇宝文，不得哭泣，临见死尸，及血秽之淹，一犯至十，罚功断事一年，然后得依科自罚，拔罪太阴，更清斋行事。过此以上二十四犯，夺算减命，玉童玉女还於本宫，不出三年，失经身丧，七玄之祖长充鬼役，万劫不解，学者慎之。

玄都中品第五篇曰：凡学者受上清宝经，三洞秘文，不得带近妇人，及行秽浊之处，皆混染真炁。十犯至二十四过，罚功断事三百日，然后得更清斋修行。过此以上，玉童玉女各还本宫，减算促命，不出三年，失经亡身，七祖被考，学者慎之。

玄都中品第六篇曰：凡学者受上清宝经，三洞秘文，而心怀贼害，手行暴虐，杀生行凶，攻掠奸宄，贤妬能，攻毁同炁，伐败经师，一犯至五，听得罚信，谢责九阴，拔罪五岳，断功禁事十年，听得清斋，还修所受。过五以上，至二十四犯，四司执杀，收摄魂神，充责北酆，七祖充役，经万劫得还，更生非人之道，玉童玉女各返上宫，不出一年，失经身亡，终不得仙，学者慎之。

玄都中品第七篇曰：凡学者受上清宝经，三洞秘文，不得北向便溺，及食五辛含血之肉，饮酒邪淫，亏道慢法，疑贰不专。十犯至二十四过，听得依科罚信，谢过太阴，断功一年，然后听更清斋九十日，还修所受。过此以上，减算促命，身被风刀

之考，七玄充责三涂，不过五年，失经身亡，学者慎之。

玄都中品第八篇曰：凡学者受上清宝经，三洞秘文，当依科赍信，诣师告斋，然后受经，不得不告盟而妄披宝文。凡诣常人得经，便师而授焉，此皆宜使授之，不得轻略窃写，及改易圣文，以意通决，毁名古音，自作一法，四司所纠，罪书九阴。一犯至三，断功禁事三年，案科自罚，投信九河，更清斋三十日，然后得还修行。过此以上，至二十四过，玉童玉女各还本宫，减算夺命，身没鬼官，七玄之祖长充鬼役，经万劫得还，更生非人之道，学者慎之。

玄都中品第九篇曰：凡受上清宝经，三洞奇文，当别室安高床，高四尺四寸，广五寸，以安所受之经，明灯烧香，朝夕礼愿，常为供养。不得使异炁之人，冒淹履秽，及妇人参入室内，触忤神真，此世间所用之科。受经之身，不得衣服履履交关非类，卧息坐起，皆当与物有异。犯者从一至二十四过，罚功断事一年，然后更清斋修行。过此以上，为四司所执，言过玉清，还名酆都，七年身亡失经，七祖被考，奉者慎之。

玄都九真明科下品赎罪篇

玄都下品第一篇曰：凡有后学之人，七祖、父母，生世有犯玄都上品、中品第一篇之罪，其考尤重，结在九阴，七祖怨对，幽掠累劫，殃充后代，冥逮不释者，皆当露身太阴之下，披散叩头，首罪九阴，三年自责。年竟，赍金环九双，青丝一两，金人一形，投於三河之口，以赎七祖之罪，拔出幽魂之难。其科朱书五行桐板一枚，记曰：某年某月某子朔如干日，某子某郡县乡里王甲，七祖、父母，下逮己身，有犯玄都上品、中品第一篇之罪，罪结九阴，今谨依科罚金环九双，金人一形，以赎幽魂酷对之罪，投书告命，归首水宫，以自解拔，罪灭三官，魂升九天。毕，以青丝缠物及版，以青石沉之。临沉之时，北向叩头，咒曰：

太阴九君执司灵官，甲今有言，归告河源，投信九泉，拔出七玄，怨对咸解，我身登仙。毕。如此七祖之考，於是释散，得离幽宫，上升福堂，己身便得参修宝经，九年克有真灵降形，与神同升也。玄科尤重，不得又犯。

玄都下品第二篇曰：凡欲修学上真之道，若己身先有犯上品、中品第二篇中之罪，其考沉结，结罪九阴，盘塞冥中，上延七祖，考对穷魂，缠绵不解者，皆当先於太阴之下，北向散发，叩头首罪三光，三年克责。年竟，当赍真朱一斤，书刀一枚，青丝一两，金人一形，投於三河之口，以赎己身酷逆之过，解结三官，拔出七祖也。其科朱书青缯一尺，上记曰：某年某月某朔某日某子，某郡县乡里王甲，年如干，甲身先无所见，行失玄科，身犯元恶，上罹玄都上品、中品第二篇之罪，罪结太阴，今以依科罚金人一形，真朱一斤，书刀一口，以续己身丑恶之罪，投书告命，归首有灵，以自解拔，罪灭九河，身得长生。毕，以青丝缠物及文，以青石沉之。

临沉之时，北向叩头，咒曰：

上有太阴执司九君，甲今有言，归告河源，赎罪解结，拔度九难，怨魂对魄，各返自然，祸灭学仙，我身得升。毕。如此九阴之结，便得解释，怨对之魂，返於自然也。便得修受上清之经，九年不亏，真灵降形，与神合冥也。玄科严重，不得又犯。

玄都下品第三篇曰：凡修上清宝经，洞玄秘文，己身有犯於上品、中品第三篇目之罪，其考结於太阴，为四司所执，言奏玉清。犯此之过，当断功克己，入室烧香，叩头自谢，北向叩齿十通，仰祝曰：

太玄幽邈，下世希闻，轻泄宝真，上亏帝尊，自投负责，伏欸灵门，伏愿高上，曲垂玄恩，降以灵感，启以自然。毕，便叩头九过。如此三年首谢，更清斋三十日，得上解三官，解考九阴，便还修行，宝秘密念，克得飞仙。玄科尤重，不得又犯。

玄都下品第四篇曰：凡修学上真之道，己身有犯上品、中品第四篇目之罪，罪结九阴，殃考玉清，犯者当於中庭夜半，然三十二灯，以洗秽炁，清明内外，入室烧香，北向叩头，首谢所犯，叩齿三十六通，仰头咒曰：

世运交丧，蜚尸翳障，秽炁纷纷，与真相迎，亏科犯戒，身入罪乡，赎以礼谢，洗以明灯，祸散三清，福充我昌，道荫曲流，其庆靡央。毕，又叩头九过止。如此一年，更清斋三十日，然后得还修事，检行慎科，勤心注真九年，克得白日登晨。

玄都下品第五篇曰：凡修上真之道，己身有犯上品、中品第五篇目之罪，罪结太阴，考悬青宫，犯者当作香汤自浴，赍油於中庭，然二十四灯九十日，入室北向，叩头九过，首谢所犯，叩齿二十四通，仰头咒曰：

天乾地坤，二象交通，阴炁混正，秽炁弥充，丧神亏宝，损落法容，谨设明灯，上映玄宫，祸灭九阴，福庆归宗。毕。如此九十日，日竟，退斋二十四日，然后得还修行真法，每在告愆，明依科文，克得玄真与形合仙。玄科尤重，不得又犯。

玄都下品第六篇曰：凡修上真之道，己身有犯上品、中品第六篇目之罪，其罪尤重，为四司所执，拷结九阴，对在幽官。有犯当於太阴之下，披散叩头，首谢玉清，解拔太阴。依科当以秘宝散乞贫民，作百人食，以饲饿乏十年。入室叩头自责，北向叩齿九通，仰咒曰：

天遐地广，九源开张，身履祸门，悬罪玉京，弥罗缠络，玄洞云场，散宝拔罪，施以穷粮，罪消太阴，福生十乡，去故奉新，方隆未央。毕，又叩头九过止。此乃高上拔罪上法，标於正科，十年如此，宿罪滞炁并消太阴，施行自责年竟，更斋百日

，然后得还修行，检身慎法，不得重犯。

玄都下品第七篇曰：凡学上真之道，有犯上品、中品第七篇目之罪，罪充上清，犯者当以上香十斤，送同学之人，合十处，拔罪一年。入室烧香，东向叩头九过，首谢上真，叩齿九通，仰咒曰：

五炁错综，上真不全，身染秽炁，触忤洞门，伤藏伐命，摇动三关，违科犯戒，罹考自延，谨以罚责，归告帝尊，乞丐使我，於今自宣，去离下世，上登天仙。毕。如此一年竟，更斋二十四日，还修所受，克得真灵下降。明科之大，不得重犯。

玄都下品第八篇曰：凡学上真之道，有犯上品、中品第八篇目之罪，为监司所执，拷结三清，犯者当以清油一斛，於中庭然灯，多少适意，惟令油尽。又以上香十斤，奉有经之师，以拔其过三年，入室烧香，北向叩头九过，首谢所犯，叩齿十二通，仰咒曰：

天真高远，玄光下明，缘恃宿庆，得观真经，未获玄科，亏略天灵，违真犯戒，沉身分冥，克自责励，归告上清，自是之后，洗濯故形，奉承玄真，与道齐并。毕，三年周竟，当更斋九十日，先以师受便得修行，未经师受，当赍信诣师，度经修行如科，克得上升。玄科尤重，不得又犯。

玄都下品第九篇曰：凡修上真之道，有犯上品、中品第九篇目之罪，罪结於太阴，悬考於玉清，犯者当然七灯於堂前，入室叩头，首罪经前，叩齿二十四通，仰咒曰：

玉光垂曜，仰彻上清，执供不礼，亏犯宝经，恐为四司，列罪紫庭，谨重斋敬，仰希真灵，曲垂下降，灭罪消刑，摄奉玄科，永保元贞。毕。如此一年，更斋二十四日，然后得还修奉所受。玄科尤重，宜自明慎，不得又犯。

右太玄九真明科，三品二十七条，出自太上灵都之宫，太上常所宝秘，不宣下世。今抄立用要诀，以付后圣、辅明三奇，标於大有素灵之经。有骨分合仙，便得此文施用，拔罪解咎，释结散理，七玄将无，三年真灵见形，与子合并，同升九天。轻泄玄科，罪同上文，唯在宝秘，密而奉行。

玄都九真篇曰：传授经目，在九真三品科中者，是后圣帝君始佩经之时，授於太上道君。太上授经，出於三品明科，以辅三宝奇文，上真道经。施用之科格，其三十一卷、独立余事及众经仪品，悉在《四极明科》之中。九真三品，以三素之上篇，置於九帝之宫，四极以四司之官，总统众非纠罚之禁律。太真明科，以太帝君所受，元始天王之玄章，上真之仪格，其法秘於九天之上，太帝之堂，藏藏於上真之宫，不行於世。九真明科以禁后学，四极明科总领四达，其旨幽微，自无金字玉名，

不得知闻。有得此篇，不须学而自成。科以禁罪，见科知改，知改则无亏於天地，无亏於天地则合於自然，合於自然便得上补於真仙也。无科而学，去仙将为远哉。

玄都九真篇曰：凡有至志，名参玄宫，欲单受明科，知天法禁，然后受经，审有骨分，亦可先告盟而授之。盟信法物，悉依三奇宝经之数，年限亦同如之。不得轻付非真，宣露玄文，不依科旨，身没鬼官，七祖父母履刀山剑树，万劫不原。外好不依科旨，罪同科文，彼此之禁，学者慎焉。

玄都九真篇曰：凡受上法，而不承明科，亏略天禁，罪累七祖，考逮一身。既知改首，罚责自励，还修所受，而回又犯，其考倍先。此则骨命不合，形与真返，魄同鬼伍，皆不得重首复修於真经也。吾今故以明科，悟於未悟，既知而犯，将何要哉。奉者慎之，奉者慎之。

太帝君偈大有妙赞

翳翳元化初，眇眇晨霞散。太寂空玄上，寥朗二仪判。凝精抱空胎，结化孕灵观。
含真颐神内，倏欻启冥旦。始悟忧促龄，运交返天汉。萧萧咏步虚，旋行礼玉京。
稽首归太无，乘风散灵香。俯仰帝皇堂，飘飘随虚翔。妙唱发奇音，吟咏太真章。
流度四大界，十天量无央。阆台发幽夜，神烛吐奇光。炜晔玉林华，熠烁曜琼堂。
虚生自然烟，蓊郁御玄纲。群真披霄赞，宝盖顺风昂。飞步咏空歌，神唱化道长。
郁郁大化隆，济济兹道兴。积学随日感，功满入大乘。福庆加一切，七祖咸得升。
整驾凌太华，回轡绝霄馆。灵风鼓空洞，香花乘烟散。萧萧礼虚堂，诜诜步玄汉。
朗咏启幽衿，拔度宿根难。五苦应时解，流芳注陶灌。玄阙峙云纲，飞霞翼灵舆。
提携无迹真，窈窕入太虚。乘空诵玉篇，萧条咏羽书。广念无不普，一切庆有余。

天帝君赞

至道生空寂，玄响阴相求。三真本元一，炁化理还殊。法轮无形内，飘飘清观流。
凝章不待思，结炁合玄符。灵唱发空歌，吟咏步虚游。玄化本无迹，有迹生道宗。
遨游九天际，息驾六领宫。提携高上宾，返我素灵房。道畅虚漠内，灵歌发太空。
形感至寂庭，思咏希微通。光翳晨晖停，曜荫玉京场。玄龙不待驾，萧萧步虚翔。
手掇七宝华，灵风散奇香。妙咏乘衿发，粲粲启玉章。万炁混元一，总归三玄梁。
乘天不云高，遐望九玄辽。振翮思玄轡，希登慕云霄。积念告灵感，期与玉真交。
暖暖天汉澄，飘飘景云回。三真腾空上，控轡迅紫微。明唱度后身，咸令乘景飞。
拔出三涂难，九玄难苦哀。

太微天帝君诵

太真生空洞，琼罗耀宝台。旋行礼玄京，众仙唱微诗。回转无迹内，虚歌契幽期。
度身上生天，吟咏积福基。策轡太霞馆，时复宴景云。飘飘无崖际，离苦入玄门。
意适道亦畅，心丹志亦分。积学随日新，咏我素灵文。八景运天舆，飞霄蔚玄灵。
素盖乘风回，寥寥入紫清。妙赞万真曲，玉响何铃铃。披拔九阴籍，度身返南庭。
庆流普一切，妙化靡不荣。清静玄道宗，明朗焕太空。妙化由静嘿，潜想三素宫。
积念彻玄虚，微微至道通。叩咏响玄寂，灵唱靡不隆。丹晖映灵庭，紫烟曜玉林。
灿烂七宝华，璀璨摇灵音。宫商自相和，妙趣倾人衿。玄唱种福田，广度无界心。

后圣金阙帝君诵

渺莽元始天，三象混玄一。萧萧正道兴，浩浩大乘逸。六炁还正庭，总归泥丸室。
出入游帝堂，流精曜云日。运周返天汉，窈窕乘玄七。圆华映明珠，二景对真光。
灵晖启翔会，玄象交扶桑。冥度自相求，阴畅朗八荒。若能餐此精，长得御玄纲。
游戏九玄台，解憩西羽阿。神兽鸣琼堂，飞凤互参差。虚生自然咏，真人唱节和。

化身劫刃庭，缘香命清歌。建功立福田，拔度后身罗。七玄散幽宫，玄离无艰那。
飞步蹑霄岭，翔翮东华宫。风云虚中唱，玉音散琼堂。真人咏空歌，妙响绝空房。
解我自然衿，成我积劫功。长啸九玄上，清瞩睹空同。龙吟绝宅府，凤啸太霄馆。
虚唱无留味，哀音乘风散。谁能究此章，精诵素灵赞。以解九阴过，拔度七玄难。

太极真人曰：《太上素灵洞元妙经》，以元始同生，灵文既存，众真诣座，烧香礼经，旋行诵此二十一篇之章，以庆於神庭也。玉音激朗，清彻九天，其句幽微，妙趣傍通，诵咏一过，万神启灵。常能究习，与帝合真，解宿对之重责，拔七玄於幽宫，释五苦於愁魂，度身生於上天。妙乎微哉，斯之灵文也。

洞真太上素灵洞元大有妙经竟

#1 此二字原缺，据文义补。

#2 『混化』原作『混元』，据后文改。

#3 『脐』字原作『齐』，据上下文改。